

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KETIGA BELAS**

PERTANYAAN : LISAN

**DARIPADA : DATO' ABD. AZIZ BIN HAJI SHEIKH FADZIR
[KULIM BANDAR BAHARU – BN]**

TARIKH : 14 OKTOBER 2014 (SELASA)

SOALAN (NO. 25)

Minta **MENTERI BELIA DAN SUKAN** menyatakan sejak belakangan ini, banyak persatuan sukan di Malaysia telah berlaku pergolakan dalaman sehingga menjaskan persediaan atlet. Apakah sebab insiden ini berlaku dan nyatakan tindakan susulan Kementerian dalam membendung masalah ini.

JAWAPAN

Yang di-Pertua,

1. Untuk makluman Ahli Yang Berhormat, sehingga 25 September 2014, sebanyak 7,695 badan sukan yang telah didaftarkan di bawah Akta Pembangunan Sukan 1997. Daripada jumlah tersebut, hanya 617 (8%) badan sukan sahaja yang telah dibatalkan pendaftarannya di mana kebanyakannya adalah kerana tidak aktif apabila gagal untuk menjalankan aktiviti dan mengemukakan laporan kepada Pejabat Pesuruhjaya Sukan.
2. Berdasarkan rekod Pejabat Pesuruhjaya Sukan, setiap tahun purata sebanyak 0.1% sahaja badan sukan yang mengalami masalah seperti pergolakan dalaman di mana kebanyakannya telahpun diselesaikan. Masalah-masalah yang berlaku didapati berpunca daripada kegagalan pemegang jawatan untuk mematuhi perlembagaannya dalam mentadbir badan sukan tersebut sehingga menimbulkan rasa tidak puas hati di kalangan ahli-ahli serta atlet. Di samping itu, isu-isu seperti konflik kepentingan juga dikenalpasti menjadi punca berlakunya pergolakan dalam sesebuah badan sukan. Namun, keadaan ini dilihat tidaklah membimbangkan dan bukan menjadi punca utama kemerosotan prestasi dan mutu sesebuah sukan tersebut.
3. Walau bagaimanapun, Kementerian tetap memandang serius dan sentiasa mengambil tindakan proaktif dalam membendung perkara ini. Kementerian dari masa ke semasa telah melaksanakan pelbagai program yang melibatkan pemegang-pemegang jawatan

utama badan sukan dalam usaha memastikan pentadbirannya berada di tahap yang professional dan cemerlang. Antara program tersebut adalah seperti Kursus Pengurusan Badan Sukan, Kursus Kepimpinan Badan Sukan, Bengkel Pengurusan Kewangan, Majlis-majlis Dialog, Seminar-seminar Pengurusan Sukan serta Program Naziran dan Pemantauan Badan Sukan.

4. Dalam usaha untuk membantu menangani isu-isu remeh badan sukan, Kementerian kadangkala terpaksa mengambil tindakan tegas terhadap sesebuah badan sukan yang mengalami masalah dalaman yang berpanjangan seperti tindakan penggantungan atau pembatalan pendaftaran selaras dengan Seksyen 20 Akta Pembangunan Sukan 1997. Sebagaimana tindakan yang telah diambil ke atas Persekutuan Kebangsaan Berbasikal Malaysia menjadi contoh bahawa Kementerian serius dalam menjaga kepentingan awam khususnya apabila melibatkan peruntukan daripada pihak Kerajaan.
5. Sungguhpun begitu, Kementerian tetap perlu berhati-hati dalam mengambil tindakan yang melibatkan aspek perundangan kerana setiap badan sukan tertakluk kepada peruntukan perlembagaannya sendiri dan di bawah bidang kuasa badan sukan di peringkat antarabangsa. Bidangkuasa Kementerian hanya berdasarkan peruntukan sedia ada Akta Pembangunan Sukan 1997 dan tidak boleh dilihat sebagai "*goverment interfere*" yang akan bertentangan dengan prinsip yang ditetapkan di peringkat antarabangsa.

Sekian, terima kasih.